

文山先生全集

三

蘇子知

PDG

文山先生全集卷之四

文集

表牋

門謝表

臣某言伏準省劄五月二十八日三省同奉聖旨文天祥
添差簽書寧海軍節度判官廳公事仍釐務臣以賜第之
初未經門謝未敢抵拜劄命申乞指揮續準省札七月十
一日三省同奉聖旨今朝謝訖之任臣謹遵奉旨揮詣闕
庭朝謝者御大廷而發策式廣旁招奉清問以攄忠誤承
親擢尚阻紫宸之謝遽叨黃紙之除曠世遭逢瞻天感激
臣切以賓興下詔同天地宗祀之彝科舉取代造化爵賢

之柄豈曰利人才之進取其間實天道之流行肆萬乘之
臨軒受諸侯之貢士占小善者率以錄咸造在廷取一人
焉拔其尤必有名世豈應庸瑱可在蒐羅臣稟質既凡聞
道猶淺才非洛陽之年少偶玷薦書學非廣川之大儒遽
塵舉首自叨異數亦既三年回思臚唱之蒙恩莫與鳬趨
而奉表有懷就日無路牋天方徬徨於丘園乃寵綬其祿
秩輒請展爲臣之禮幸許脩詣闕之恭茲蓋伏遇皇帝陛
下德體乾行道符常久世更三紀遠追成周式化之風歲
啓後庚近接藝祖開基之運凡際風雲之會咸依日月之
光遂令一介之姓名亦被九重之記錄臣敢不誓堅素守

勉企前修自揆讀書非爲平生溫飽之計願言竭節用副
上心忠孝之期臣無任瞻天望聖激切屏營之至謹奉表
陳謝以聞

湖南提刑到任謝皇帝表

帝庭敷命昭闢四門天牧播刑誤頒一節申以過驅之旨
疇茲已試之庸周隰載馳漢條具布伏念臣本無他技惟
有孤忠兩朝特達之知洊塵清要十載行藏之跡祗自悔
尤雲雷之義方屯天地之心已復當元日達聰之始在皇
華遣使之中聖恩靡許於祝釐臣職敢稽於行道瞻蓋高
而下耳冀用譽於折肱茲蓋恭遇皇帝陛下道協重華仁

周四表崇德廣業合乾轉坤翕之功折獄致刑得震動離
明之用遂令承乏復忝司平臣敢不祇若咨詢對揚欽恤
陳時集事尚弘康乂之圖受王嘉師永迪明清之訓

謝皇太后表

司平楚甸命出嚴宸告至周原恩歸慈極敢敷睿訓仰謝
徽音伏念臣一介寒微兩朝知遇傾葵向闕初無補於使
令毀菽杜門祇自深於觀省當元日會同之始拜公朝拔
拭之仁言遣使臣徃陳集事華省遄頒於趣旨叢祠竟秘
於俞音勉臣子之驅馳見吏民而宣布茲蓋恭遇壽和聖
福皇太后陛下心起有極道合無疆長信怡愉焚香圖之

昌運大任肅穆開蒼籙之隆平宜擇攸司俾敬爾獄臣敢
不丕承欽恤誕布慈仁乂我黎民尚想無刑之治于其王
母敢忘介福之元

謝皇后牋

君子審官道隆儷極皇華遣使命出治朝德意具宣忱辭
告至伏念臣踈庸一介遭遇兩朝早綴班行嘗忝金科之
屬繼秉使傳復塵繡指之行曲成每戴於釐明退食難逃
於吏議不圖元會復錫恩言拔拭起家徃陳時臬驅馳在
道寅奉天威涖止攸司欽哉乃職茲蓋伏遇皇后殿下德
侔坤地位正家人闕雅之化既行用之天下象魏之法使

布正自王宮爰取踐更載叨詳讞臣敢不靈承欽恤抵若
平反無刑以乂黎民誕敷聖化式敬以長王國永誦徽音

皇太子生日賀皇帝表

大夏長嬴坤二爻之紀季千秋似續震一索之揆初瑞彩
緣車歡顏丹衷恭惟皇帝陛下德流芑水業茂蘿圖壽富
多男積善必有餘慶本支百世命吉在厥初生記甲觀之
瑞分占乙謀之祚遠臣縻身軫墊戴目心星誦億子之宜
君首歌周雅祝萬年之爲父更續唐詩

賀皇太后表

福于王母際南面之昌期天以神孫娛東朝之永日晝堂

瑞節長樂歡聲恭惟壽和聖福皇太后性蘊冲和仁培靜
壽思齊所以聖也以御于邦螽斯宜爾孫今克開厥後皇
皇穆穆繼繼承承臣迹滯騏原心馳鳳闕本支百世播緜
瓌之聲詩怡愉萬年衍含飴之福慶

賀皇后牋

坤后廣生式協二爻之月震男揆度載逢一索之期慶衍
蘿圖喜充椒掖恭惟皇后殿下道柔配地德厚承天以御
于家爲今京室之婦則樂有子如古周南之風百世本支
萬年福祿臣迹縻牲轡心賀燕謀占斯千之詩已符吉慶
美思齊之德益嗣徽音

皇子進封左衛上將軍嘉國公賀皇帝表

乾父垂仁茂積蘿圖之慶震男鍾美肇基茅土之邦百世
可知四方來賀洪惟昭代爰立親親粵有舊章禮優貴貴
昉祥符之七載侈慶國之初封綺仗分班珠珪䟽寵庸表
人倫之厚適觀王室之疆式于今休監于成憲恭惟皇帝
陛下福培周厚和緝堯雍寶曆無疆方萬年而受祐金枝
有煒期億予以宜君錫以嘉名渙其大號地營東井詔爵
五之最穹天拱北辰炳心三之相照克昌厥後長發其祥
臣有蹇牡駢阻隨虎拜祉歌予施迺陳皇矣之詩道盡君
嚴願贊家人之易

賀皇太后表

東朝保艾方隆堯母之仁西國分茅式篤文孫之慶兩宮
喜色萬宇歡聲恭惟壽和聖福皇太后陛下德厚慈元神
怡長樂尊之至也上承視膳之勤宜爾繩弓下適含飴之
趣瑤池日永玉葉春濃臣遠被繡衣踰瞻綵仗于其王母
知介壽之來崇佑我後人願丕圖之有衍

賀皇后牋

坤稱乎母儼家服於椒塗震索而男赫龍光於茅土長秋
喜色方夏歡聲恭惟皇后殿下含弘承天博厚配地祥鍾
長發熾商後於有娥音繼思齊培文昭於大姒主琬焜煌

於綺伏芾朱輝映於褱衣臣遠驟華原瞻瞻藥殿想宜君
之穆穆茂對王休侈多子之繩繩載歸后笑

皇女進封同壽公主賀皇帝表

乾見大人道風降於乾體巽爲長女命爰寵於巽申喜溢
宮庭歡騰海宇竊惟興君之際必有積善之餘播在正風
則曰王姬之美陳于小雅是爲女子之祥無非歌福祿之
同于以表國家之盛恭惟皇帝陛下和順而理溫柔以容
苞體深仁既歲餘瓜之陟岡陵厚積後培穠李之華始封
爰遴於嘉名遐祉永齊於聖壽臣跡縻使事身隔賀班親
愛如家遙贊人倫之厚肅雍迪教適觀王道之成

賀皇太后表

周家福祿積由任姒之仁堯母聖神親覩娥英之慶宮闈
盛典海宇歡聲恭惟壽和聖福皇太后陛下南極景光東
朝基貴有功寶祚既開聖子之傳流澤銀潢爰毓天孫之
瑞贊初封於沁水同上壽於瑤池臣遠玷皇華隄瞻長樂
怡愉太后諒承婉婉之娛雍肅王姬益表儉慈之教

賀皇后牋

坤萬物之資生實蕃慶積巽一索之謂長昉對命申喜氣
宮闈歡聲海宇恭惟皇后殿下關雎孝敬茱苾和平灼灼
宜家風範華桃之懿雍雍成德茂鍾穠李之英賁然錫沁

水之封展也同長秋之壽臣遠縻苞杞遙睇塗椒風以周
南仰化原之洵美觀于堯女願毋道之浚明

知贛州到任謝皇帝表

九重選牧錫類天寬千里承流奉親地近昉共侯度不戴
王休伏念臣某才本空疎分安孤苦身逢盛代夙自厲於
丹心家有重親晚相依於白髮頃叨漢傳徃即楚封何敬
非刑粗碑審克不遑將毋私切懷歸嘗懇懇以陳情冀高
高之欲從遄蒙異渥特畀近麾繼盼旨以趣征已鞠躬而
祇上祿及一門之微賤恩同大造之生成茲蓋伏遇皇帝
陛下以堯舜之資行曾閔之道嗣寧王之大歷茲我成功

奉太后之萬年與天齊壽遂使丕求芻之寄亦獲共啜菽
之歡臣敢不老老及人親親爲政由家達國期與遜以興
仁以子移臣寓爲忠於爲孝

謝皇太后表

東朝鴻慶介壽無疆南國虎符便親有命荷中宸之渙寵
望慈極以飯忱伏念臣一介迂疎兩朝遭遇昔備殫於敷
歷無以逾人頃間任於驅馳不遑將母惟內懷於烏哺遂
上徹於蟻忱果分二水之麾爰易三湘之節惟壤地接故
可以供菽水之職惟土風習故可以盡芻牧之心自省叨
踰若爲報稱茲蓋恭遇壽和聖福皇太后陛下德光堯母

功配周姜壽錫萬年享怡愉之福化流四海推慈孝之仁
遂令下吏之僥榮獲以邇封而就養臣敢不祇承德意誕
布恩言服膺錫類之詩益崇美化拜手牧民之訓喻贊徽
音

謝皇后牋

慈極承天恩深錫類薦車易地職重分符布聖德之中和
便親闈之溫清伏念臣起繇孤遠積有迂踈骯髒半生於
事君而何補驅馳近歲以將母而未能屬爲養以陳情荷
畀矜而從欲三湘納節二水授麾固刺史之車庶乎爲子
捧郡守之檄專以爲親僥冒實多糜捐曷稱茲蓋恭遇皇

后殿下道隆坤厚德配乾仁大雅思齊媚周姜而穆穆長
秋備禮奉漢母以愉愉遂令疎遠之微臣亦效旨甘於便
壘臣敢不恪恭侯度茂對王休崇關雎卷耳之風迪惟懿
則篤南陔白華之行施及遐萌

壽崇節本州賀皇帝表

天子有親備四海九州之奉封人祝聖同萬年億載之期
凡屬照臨舉同呼舞恭惟皇帝陛下剛建中正緝熙光明
燭六合而耀八紘功參天地躋三皇而軼五帝道御家邦
紹巍巍蕩蕩之勲盡尊尊親親之養怡愉誕節光大前聞
臣獲布寬條幸逢盛際鵷鸞阻綴莫旌賀於東朝螻蟻傾

忱惟仰瞻於南極

賀皇太后表

於萬斯年慈宸有慶誕彌厥月祖佛同生旒冕敬共縉紳
舞蹈恭惟壽和聖福皇太后陛下道超太始德厚重坤闕
睢周南之風夙陶美化思齊文王之母懋著徽音袵衣初
奏於薰絃宮珮畢朝於慈宸親下袞龍之拜載揚韶鳳之
音呼萬歲者三歡騰朝野等百世而上福衍子孫臣叨守
魚符莫陪駕序我百而爾九十諒喜溢於舉觴心一而臣
三千第神馳於拱極

賀皇后牋